

		
<p>Earth Charter Greenland</p> <p>Foreningen af 16. august</p>		 <p>TRANSPARENCY INTERNATIONAL the global coalition against corruption GREENLAND</p>

Tusagassiuutitut nalunaarut

Naalakkersuisut imatut innuttaasunik peqataatsineq pitsaanerulersinniarssinnaavaat

Naalakkersuisutiguunngitsumik suliniaqatigiiffiit suleqatigiiffianni, 2013-imi oktobarimi pilersinneqartumi ataatsimoorussamik aatsitassarsiornermi ikummatissarsiornermilu innuttaasunik peqataatsitsinerup pitsanngorsarnissaanik anguniaqartumi, eqimattakkaarlunilu isumasioqatigiinnertalimmik ataatsimiinnerni arlalinni oqallisigisigineqarsimavoq, qanoq iliornikkut suliani angisuuni aammalu aatsitassarsiornermi ikummatissarsiornermilu ingerlatsinerni innuttaasut peqataatinneqarnerulernissaat qulakkeerneqarsinnaanersoq. Oqaloqatigiittarnerni angusarineqartut Naalakkersuisunut apuunneqassapput. Naalakkersuisutiguunngitsumik suliniaqatigiiffiit suleqatigiiffiata inassuteqaataat marsip 25-anni tusagassiuutitut saqqummiunneqassapput.

Naalakkersuisutiguunngitsumik suliniaqatigiiffiit suleqatigiiffiata innersuussutigaa aalajangiinarnermi periutsit annertunerpaamik ammasuusarnissaat aammalu innuttaasunik peqataatsitsarnerup inatsisiliunneqarnissaa, taamaaliornikkut innuttaasut peqataatinneqarnissaminnut pisinnaatitaaffii inatsisitigut qulakkeerneqarniassammata. Transparency International Greenlandip siulittaasua Anders Meilvang tamatumingga imatut itisiliivoq: "Tamanna pisariaqarpoq innuttaasut peqataatinneqarnissaata immikkut inatsisiliunneqarneratigut aammalu sammisaq manna pillugu nunat tamalaat akornanni isumaqatigiissutit atuutilersinnerisigut malinneqalernerisigullu, pingaartumik Aarhus-imi isumaqatigiissut aammalu peqquserlulluni iluanaarniartarnej akiorniarlugu FN-ip isumaqatigiissutaa. Pingaaruteqarpoq pisinnaatitaaffiit isumaqatigiissutini taakkunaniittut kalaallit inatsisiliaannut ilanngunneqarnissaat malinneqarnissaallu."

"Innuttaasut pisinnaatitaaffeqartinneqalerunik aamma allaffissornikkut maalaarfigisinnaasaannik periarfissiisoqartariaqarpoq. Tamatumanilu pingaaruteqarluinnarpoq oqartussaaffiup suliamik suliarinniffiisartup aalajangiiffiisartullu aammalu maalaartarfissap immikkoortilluinnarnissat." Anders Meilvang nangippoq.

ICC-imi siulittaasoq Aqqaluk Lyngé ima oqarpoq: "Naalakkersuisutiguunngitsumik suliniaqatigiiffiit suleqatigiiffiata innersuussutigaa, innuttaasut peqataatinneqarnerat pillugu

ersarissumik suleriaasiliornissaq. Innuttaasooq kinaluunniit aalajangiiniarnermut attuumassuteqartoq oqaaseqarsinnaanissaminut periarfissaqartariaqarpoq. Taamaattumik Naalakkersuisutiguunngitsumik suliniaqatigiiffiit suleqatigiiffiata innersuussutigaa, paasissutissanik ingerlatitseqqiisarneq atituumik, arlaannaannulluunniit pituttorsimannngitsumik tutsuiginartumillu pisassasooq oqaatigalugulu pisinnaatitaaffik tamanna paasissutissanik ingerlatitseqqiinermit qulakkeerneqartussat ilagimmassuk, taamaaliornikkut innuttaasut amerlanerit oqaaseqarsinnaanissamut periarfissinneqassammata.”

Innuttaasunik peqataatitsineq nunat tamalaat akornani isumaqatigiissutini pingaartinneqartuarterpoq, minnerunngitsumik inuit pisinnaatitaaffii avatangiisinillu illersuineq pineqartilugit. Avatap siulittaasua Mikkel Myrup ima oqarpoq: ”Politikkikkut aalajangiiniarnermi innuttaasunik peqataatitsineq tunngaviusumik naleqartitaallunilu sakkussaavoq tunngaviusumik inuit pisinnaatitaaffiit qulakkeerinnittussat – tassaasunik naqisimaneqanngitsumik oqaaseqarsinnaatitaaneq, katersuussinnaatitaaneq aammalu peqatigiiffilorsinnaatitaaneq. Naalakkersuisutiguunngitsumik suliniaqatigiiffiit suleqatigiiffiata pingaartippaa, qulakkeerneqassasooq innuttaasut paasinnissimanermik tunngaveqarlutik annertunerusumik peqataatitsinissaat.”

Tusagassiuutinik katersortitsineq ingerlanneqassasooq marsip 25-anni nal. 10, Naalakkersuisutiguunngitsumik suliniaqatigiiffiit suleqatigiiffiata allaffeqarfiani, Imaneq 11-mi, Oles Varehus-itoqqami, tassanilu najuutissapput Naalakkersuisutiguunngitsumik suliniaqatigiiffiit suleqatigiiffianit sinniisut. Naalakkersuisutiguunngitsumik suliniaqatigiiffiit suleqatigiiffianni suliniaqatigiiffiit qulingiluat inuillu ataasiakkaat arlallit ilaasortaapput.

Naalakkersuisutiguunngitsumik suliniaqatigiiffiit suleqatigiiffiat neriuppoq innuttaasut oqalliseqataassasut, aammalu innersuussutit pillugit isummaminnik apuussaqaassasut, taakku atuarneqarsinnaassapput www.icc.org –imi aamma www.transparency.gl –imi kiisalu suliniaqatigiiffiit internet-ikkut attaveqaataanni. Innuttaasut tikilluaqqusaapput innersuussutit pillugit oqalliseqataanissaminnut.